



Bahir Imamović iznuđivao novac od firme "Tuzla-kvarc"

Zbog primanja mita uhapšen pomoćnik ministra industrije TK

Uhapšeni Imamović navodno je od vlasnika "Tuzla-kvarca" tražio da podigne kredit u iznosu od 30.000 maraka i da mu preda taj novac

Bahir Imamović, pomoćnik ministra industrije, energetike i rudarstva u Vladi Tuzlanskog kantona, uhapšen je jučer u operativnoj akciji "Kvarc" pod sumnjom da je počinio krivično djelo primanja dara i drugih oblika koristi.

Složena istraga

Imamović je, saznajemo, uhapšen prilikom predaje dara, odnosno 10.000 maraka koje je trebao uzeti od jednog od rukovodilaca preduzeća "Tuzla-kvarc" iz Tuzle, koje već mjesecima ne radi jer mu nije odobrena koncesija za eksploataciju kvarcnog pijeska na području TK.

- Akciji "Kvarc" prethodila je višemjesečna složena kriminalistička istraga u okviru koje su zadokumentirane nezakonite aktivnosti osumnjičene osobe u ovom predmetu – navodi se u saopćenju SIPA-e, čiji su pripadnici i uhapsili Imamo-



Imamović s pripadnicima SIPA-e: Priveden prilikom primopredaje novčanica

vica.

Uhapšeni Imamović navodno je od vlasnika "Tuzla-kvarca" tražio da podigne kredit u iznosu od 30.000 maraka i da mu preda

taj novac kako bi pozitivno bio riješen njegov zahtjev za dobivanje koncesije, koju ova firma već duže vremena ne posjeduje. Iz "Tuzla-kvarca" o svemu su obavijestili istražne organe, nakon čega se uključila SIPA, te je tokom jučerašnjeg dana, prilikom primopredaje novčanica, koje su prethodno bile obilježene, Imamović uhapšen.

Slučaj hapšenja visokog dužnosnika Vlade TK zbog uzimanja mita nije jedini, a vjerovatno neće biti ni posljednji. Javna je tajna, naime, da se pojedini dugogodišnji pomoćnici ministara u nekoliko ministarstava u TK, koji su svoju moć obi-

lježili pečatom državnog službenika, dovode u vezu s kriminalom vezanim uz privatizaciju pojedinih tuzlanskih firmi, zatim uzimanje mita prilikom zapošljavanja u državne institucije, itd.

Pretres vozila

Iako nije saopćeno na kojoj je lokaciji jučer uhapšen Imamović, na društvenim mrežama pojavile su se informacije da je njegovo hapšenje izvršeno na parking u naselju Irac, pored nekadašnjeg objekta "Tuša". Iz SIPA-e su saopćili da je tokom dana pretreseno jedno vozilo, kao i jedan stambeni objekt.

Blokiran rad firme

- Mi mjesecima nemamo plaće jer je zbog neposjedovanja dozvole o koncesiji zaustavljen rad "Tuzla-kvarca".

Jučer (prekjučer, op. a.) skupa s predstavnicima Sindikata solidarnosti otišli smo kod ministra Srdana Mićanovića kako bismo razgovarali o mogućnosti dobivanja dozvole za

koncesiju, odnosno rješenu problema 50 radnika koji već mjesecima nemaju plaću. Na sastanku je bio i Imamović i umalo nas nisu izbacili iz kancelarije. Vidjelo se da ovdje nešto smrdi. Bit će dobro ako se hapšenja nastave - kazao nam je Senad Mehanović, predsjednik Sindikalne podružnice "Tuzla-kvarca".